



AGULLA DE MAREAR

Seis
ideas
para
unha
cidade
ao teu
lado


MAREA
ATLANTICA

1ª idea dereito á vivenda



Contra o modelo urbanístico depredador que imperou moitos anos nesta cidade, o goberno da Marea Atlántica aposta pola vivenda como dereito.

- **Vivenda pública.** O goberno municipal quere aumentar o seu parque de vivenda pública, coa adquisición de solares e edificios abandonados, para poñelos a disposición de quen os precisa. Investiranse **2,5 millóns de €** nun programa para adquirir novos inmobles e para rehabilitar as vivendas que xa posúe o Concello.
- **Vivenda social.** Poranse en marcha varios programas de aloxamento temporal para colectivos vulnerables: vítimas das violencias machistas, familias desafiuzadas, persoas refuxiadas... Tamén se destinarán varios pisos, debidamente rehabilitados, ao **alugueiro social**: prezos mínimos para potenciar o mercado do alugueiro na nosa cidade, coa porta aberta á mocidade e a diversos colectivos vulnerables (**380.000 €**).
- **Vivenda de calidade.** Aumentan considerablemente as subvencións para a rehabilitación de vivendas habituais, mellorando o seu estado de conservación, illamento e eficiencia enerxética (**1,2 millóns, +55%**) e para a instalación de ascensores que as fagan accesibles (**1,45 millóns, +21%**).



2ª idea coidar do espazo público

Os espazos públicos, os que son de todos e todas nós, definen a cidade. Apostamos por coidalos, para ter unha Coruña máis humana.

- **Coidado das rúas.** Con actuacións de baixo custo e alto impacto: **3,2 millóns** na mellora das beirarrúas, facéndoas máis accesibles. Outros **1,5 millóns** para amañar o pavimento e as calzadas. E **550.000 €** para coidar das áreas de xogos infantís, equipamentos biosaudables e espazos lúdicos abertos. En todos estes eidos, melloráronse os contratos para que o traballo non consista só en tapar fochas, senón en mellorar as rúas por completo. A maiores, destínanse **3,2 millóns** para obras de urbanización.
- **Colexios públicos.** Continúa o compromiso coa reparación e mantemento dos centros de educación pública, con máis de **700.000 €**. Onde a Xunta non chegue, estará o Concello da Coruña, apostando polo ensino para todas.
- **Espazos verdes.** Avanzaremos na eliminación das especies invasoras e renovaremos o contrato de Parques e Xardíns (**6 millóns**) cunha xestión máis ecolóxica. Desenvolveremos un programa de expansión do arborado (**180.000 €**) que nos faga unha cidade máis amable e axude a afrontar o cambio climático.
- **Xestión de residuos.** En 2017 renovárase o contrato de recollida de lixo: novos contedores, camións adaptados ás rúas máis estreitas e máis silenciosos, recollidas máis frecuentes, programas piloto de compostaxe... E campañas para buscar a corresponsabilidade dunha cidadanía sensibilizada (**máis de 10 millóns**).
- **Natureza e benestar animal.** Queremos revivir os ríos ocultos da cidade, e recuperar os tramos do Río de Quintás ou o río Mesoiro ao seu paso por Feáns. Queremos protexer espazos de alto valor natural como as Illas de San Pedro ou Punta Herminia (200.000 €). E tamén miraremos polas mascotas con áreas caninas, fomento da adopción, colonias felinas... (**166.000 €**).

3ª idea mobilidade sostible



A Coruña, pola súa xeografía, require un coidadoso planeamento da mobilidade, para resolver os problemas que levan décadas arrastrándose.

- **Posta ao día das liñas de bus urbano.** O mapa do transporte público na Coruña foi debuxado nos anos oitenta. Pouco cambiaron as rutas desde entón, e moito a cidade. Para que o bus urbano sexa unha alternativa, apostarase por traxectos máis curtos, con buses que pasen cada cinco ou seis minutos, e con trasbordos para os percorridos máis longos (**500.000 €**).
- **Espazo para as bicis.** En 2017, o goberno municipal quere crear un carril bici urbano, un proxecto de **máis dun millón de €**, para que sexa máis rápido e seguro moverse en dúas rodas e sen motor. Tamén se reforzará o servizo de Bicicoruña, con novas estacións e bicicletas (**60.000 €**).
- **Melloras na estación de autobuses.** Ao fío da mellora do transporte público urbano, coidarase tamén da infraestrutura que conecta a cidade coa comarca, o país e o resto do Estado. Investiranse **130.000 €** en acomodar a estación de autobuses ás necesidades dos usuarios, con novas pantallas de información e consignas automáticas.
- **Participación cidadá.** Para garantir que o que se faga en mobilidade atenda ás necesidades da cidadanía, porase en marcha un proceso participativo, aberto e inclusivo, para que as coruñesas e coruñeses poidan facer valer a súa voz (**140.000 €**).



4ª idea

economía para as persoas

Unha economía centrada nas persoas require dun xiro para facilitar a inclusión, os dereitos laborais e os coidados da vida. Hai alternativas para un novo modelo económico.

- **Emprego.** 2017 será o ano para impulsar o Plan de Emprego do goberno municipal, consensado coas asociacións e colectivos da cidade. Está dotado con case **700.000 €**, un 20% máis que o ano pasado, e inclúe accións formativas (Coruña Emprega), un Pacto Local polo Emprego, e programas de orientación laboral. Existen, ademais, dous plans específicos, dirixidos ás mulleres e á mocidade.
- **Comercio.** O pequeno comercio é un dos motores da cidade. Resérvanse **630.000 €** para dinamizalo con distintas campañas: Samaín, Nadal, Mercadiños urbanos...
- **Mercados.** Os mercados municipais son unha das prioridades do executivo. Nesta proposta de orzamentos hai **1,6 millóns de €** para melloralos e reparar os seus defectos. Ademais, continuarase sacando a concurso os postos baleiros, como unha achega ao emprego de calidade.
- **Outras formas de facer.** O proxecto do goberno da Marea Atlántica procura reforzar outras formas de relación económica. Traballarase pola redución da pegada de carbono, o consumo responsable, e os proxectos sostibles.
- **Innovación democrática.** O cambio de modelo tamén pasa pola participación cidadá. A través de iniciativas como o Co-Lab, un proxecto de innovación social para facer unha cidade máis igualitaria, deixarase espazo para que a xente tome a iniciativa e marque o rumbo da Coruña (**169.000 €**).

5ª idea área metropolitana



A Coruña non remata na Ponte da Pasaxe. Hai políticas e proxectos que non caben nun só concello. É hora de impulsar a Área Metropolitana tras 30 anos de parálise.

- **Impulso da Área Metropolitana.** En 2017 é o momento de deixar claro o modelo que queremos para os próximos 50 anos na comarca da Coruña. Desde o consenso e a cooperación, traballarase para levar este ano ao Parlamento de Galicia un proxecto de Lei da Área Metropolitana.
- **Repensar Nostián.** Auditaremos a planta para ver de adaptala a novas estratexias de Residuo Cero. Desenvolveranse un plan metropolitano para a recollida e tratamento do lixo, para analizar a viabilidade ao longo prazo da planta, e modelos de xestión dalgúns residuos máis descentralizados coa área metropolitana (100.000€).
- **Ría do Burgo, o corredor verde que une a comarca.** Eliminación de todos os vertidos á Ría do Burgo. Na Coruña xa se arraxaron mais da metade das verteduras en 2016, pero é necesario localizar e solucionar os casos en toda a comarca. Precisamos activar tamén un servizo de inspección constante que nos dea alerta temperá ante roturas ou fallos na rede (+250.000 € en total).
- **Participación.** A plataforma de *A Porta Aberta* poñerase a disposición dos Concellos da Área Metropolitana, xunto con todos os programas de participación e innovación democrática do Concello da Coruña. A meta é compartir códigos, procedementos e recursos.
- **Observatorio de Igualdade e Diversidade.** Un recurso para a identificación de situacións de desigualdade na cidade da Coruña e en toda a comarca.



6ª idea

dereito a unha vida digna

Primeiro as persoas, a atención ás necesidades e dereitos básicos para construírmos en igualdade e solidariedade colectiva.

- **Renda Social Municipal.** Tras os primeiros meses de implantación, en 2017 desenvolverase plenamente esta axuda para rescatar as persoas ao borde da exclusión (**2 millóns €**).
- **Xustiza Social.** Creación dun local de baixa esixencia para as persoas sen teito (**250.000 €**). Aumento das bolsas-comedor (**900.000 €**, **+20%**).
- **Conciliación.** Amplíanse os servizo de axuda a domicilio (**6,8 millóns**, **+20%**) e de canguraxe (**280.000 €**)
- **A Coruña libre de violencias machistas.** Por unha cidade sen agresións, sen desprezos nin acosos, na que a veciñanza colabore para lograr a igualdade real (**170.000 €**), e cunha sólida Rede de Acolvida.
- **A Coruña, cidade refuxio.** Un proxecto que en 2017 podería estar dotado con máis de **150.000 €** para acoller ás refuxiadas e migradas.
- **Inclusión da diversidade.** Plan para a atención á diversidade sexual e ás identidades de xénero, unha riqueza que temos que coidar.
- **Orzamentos Participativos.** Un millón de € en proxectos escollidos pola veciñanza: instalación dunha estación de Bicicoruña en cada barrio, creación dun parque canino, aplicación móbil para incidencias...
- **Apoio á cultura local.** Plan para botarlle unha man ás artistas da cidade, festivais, salas e centros culturais, asociacións veciñais, entidades deportivas (**930.000 €**). Proxecto piloto para que as asociacións axuden a xestionar os espazos escénicos municipais (**72.000 €**).
- **Deporte na rúa.** Actividades no espazo público a través do plan Coruña en Forma (**50.000 €**). Reparación dos equipamentos deportivos ao aire libre (**100.000 €**).

Tras as cifras, a cidade

Nesta pequena publicación, podes atopar as liñas básicas que o goberno da Marea Atlántica quere introducir nos Orzamentos municipais de 2017. Non é un simple listado de promesas, cifras e letras. **Son as bases dun modelo de cidade**, do proxecto que queremos desenvolver nos próximos dous anos e medio de mandato, para que este sexa un lugar mellor para vivir, onde as persoas teñan cubertas as súas necesidades fundamentais, onde os servizos, os dereitos e a propia Coruña estean máis preto da súa xente.

Seis son as ideas centrais desta proposta de contas públicas: **A vivenda**, para axudar a que o dereito a un teito non sexa só unha frase baleira na Constitución; o coidado do **espazo público**, para recuperar o que é de todas; a mellora da **mobilidade** para que o coche non sexa o único xeito de chegar a algures; o fomento do **emprego** de calidade e dun modelo económico baseado na cooperación, onde os cartos non teñan máis valor que as persoas; a creación da **Área Metropolitana**, porque

A Coruña xa hai anos que non cabe nas fronteiras dun só concello; e, por suposto, o reforzo das **políticas sociais**, para tenderlle a man a todos os dereitos que garanten unha vida digna.

Tamén incorporan, por primeira vez na historia da cidade, proxectos seleccionados pola propia veciñanza nun proceso de Orzamentos Participativos, por valor dun millón de euros. Foi a voz da xente quen escolleu que se fai con estes cartos públicos.

Estes son os proxectos que o goberno municipal está a negociar coa oposición nestes días. **Nacen como unha resposta ás necesidades da cidade e da veciñanza**, recollidas en distintos espazos de participación, e da vontade política de traballar desde o Concello da Coruña para **a maioría social**, levando ata o límite as competencias municipais. Son ideas nas que, se pensamos na cidade e non nas cores de cada partido, non debera ser difícil chegar a un consenso. Son medidas para unha cidade contigo.